

WEEKAKASE KATONDA



Era wasoma bwewati:

Awo Eriya Omutisubi, eyali...atuula e Gireyaadi, n'agamba Akabu nti MUKAMA Katonda wa Isiraeli nga bw'ali omulamu, gwe nyimiririra mu maaso ge, tewaabenga musulo newakubadde enkuba mu myaka essatu gino, wabula ng'ekigambo kyange bwe kiri.

Awo ekigambo kya MUKAMA ne kimujjira nga kyogera nti,

Va wano, okyuke ogende ebuwanjuba, weekweke awali akagga Kerisi—Kerisi, (kye ntegeeza) akoolekera Yoludaani.

Awo olulituuka onoonyweranga mu kagga; era ndagidde banamuŋŋona okukuliisiza...

Awo n'agenda n'akola ng'ekigambo kya MUKAMA bwe kyali: kubanga yagenda n'abeera awali akagga Kerisi akoolekera Yoludaani.

Awo bannamuŋŋona ne bamuleeteranga emmere n'ennyama enkya, n'emmere n'ennyama akawungeezi; n'anywanga mu kagga.

Awo olwatuuka ddaaki, akagga ne kakala olw'obutaba nkuba mu nsi.

Awo ekigambo kya MUKAMA ne kimujjira, nga kyogera nti

Golokoka ogende e Zalefaasi, ekya Sidoni, obeere eyo: laba ndagidde omukazi nnamwandu ali eyo okukuliisanga.

Awo n'agolokoka n'agenda e Zalefaasi: awo bweyatuuka ku wankaaki w'ekibuga, laba omukazi nnamwandu ng'ali eyo ng'alonda enku: n'amuyita, n'ayogera nti, Nkwegayiridde, nkimira, otuzzi mu kibya, nnywe.

Awo ng'agenda okugakima, n'amuyita n'ayogera nti, Nkwegayiridde, ndeetera akamere mu mukono gwo.

N'ayogera nti, nga MUKAMA Katonda wo bw'ali omulamu, sirina mugaati, wabula olubatu lw'obutta mu ppipa n'otufuta mu kasumbi: era, laba, nsennya enku bbiri nnyingire nneefumbire nze n'omwana wange, tubulye, tufe.

Awo Eriya n'amugamba nti, Totya; genda okole nga bw'oyogedde: naye sooka obunfumbiremu akagaati,

*okaleete gyendi, oluwannyuma weefumbire wekka ne . . .
omwana wo.*

*Kubanga bw'atyo bw'ayogera MUKAMA Katonda wa
Isiraeri nti eppipa ey'obutta terikendeera so n'akasumbi
k'amafuta tekaligwaawo, okutuusa ku lunaku MUKAMA
lw'alitonnyesa enkuba ku nsi.*

*Awo n'agenda munda n'akola nga Eriya bw'ayogedde:
omukazi, naye, n'ennyumba ye, ne baliira ennaku
nnyingi.*

*Eppipa ey'obutta teyakendeera so n'akasumbi
k'amafuta tekagwaawo, ng'ekigambo kya MUKAMA
bwe kyali, ekyayogerwa Eriya.*

Olw'eky'okwogerako enkya ya leero, nga ssinnagenda mitala wa mayanja, nnonze eky'okuyigako, kino nti: *Weekakase Katonda.*

² Era kakaano, Mukama, wa omukisa Ekigambo Kyo nga bwekigenda mu maaso, era leka Omwoyo Omutukuvu atwale endowooza zaffe n'ebirowooza byaffe, atuteeketeke ku lw'okukyaala Kwe, nga bwe tumusabye okujja. Kubanga tetujja mu nyumba ya Mukama kulabibwa, oba okulaba, naye okuyiga ku Gwe, n'okutegeera enkula Yo, n'ekukubo Lyo, n'ensonga Zo, tusobole okweŋŋanga ebizibu byobulamu, n'obukakafu obwanamaddala, nga tweekakasa Katonda. Kituwe, Mukama. Mu Linnya lya Yesu tukisaba. Amiina.

³ Gateekwa okuba nga gaali makya ga ntiisa. Ebbugumu lyali lisusse awamu n'enfuufu, era abantu baali ku nguudo, nga balumwa enjala, nga n'ensi ebuguma nnyo nga ebulako kujja. Bino byonna by'ali biva mu kwonoona kwabwe n'obuvundu bw'empisa zaabwe.

⁴ Olaba, Akabu ye yali afuga mu—mu Isiraeri, mu kiseera ekyo, oba atwala Isiraeri, era ye yali asinga obujeemu mu bakabaka ba Isiraeri bonna. Waali tewabeerangawo kabaka mujeemu kwenkana Akabu, kubanga ye, okuba nga yali yayigirizibwa nga ate amanyi okusingako, teyalema kweyongeranga kunyiiza Katonda mu buli kye yakolanga. Newakubadde nga yalina enkola ey'ekitalo ey'ekinnamagye, era nga n'abantu baali bakulaakulanye nnyo mu kufuga kwe, naye, ate, toyinza kunyiiza Katonda n'osuubira okweyongerwa mu maaso ebbanga eddene.

⁵ Era nate, ku mbaga ye, mu kifo ky'okuwasa okuva mu bantu be ye, yasukkawo n'agenda awasa omwonoonyi, omusinza w'ebifaananyi, okusinza kw'ebifaananyi. Yawasa Yezeberi. Era teyali mukkiriza.

⁶ Era tewali mukkiriza agwanidde okuwasa atali mukkiriza, ka kibe kki. Bateekedwa kuwasanga bakkiriza.

7 Naye Akabu yali akoze ekibi kino. Era tewali kubuusuusa nti Yezeberi yali mukazi mubalagavu. Era yali yegombye ndabika ye, mu kifo ky'ekyo kye yali. Era, abantu bangi bazze bakola ensobi eyo n'okutuusa leero.

8 Era yali aleese okusinza ebifaananyi mu ggwanga, mu bantu. Era abantu, bakabona, abaweereza baabwe, baali bawanguddwa olw'ekintu kino abasinga obungi kye baali bayaayanira.

9 Era kye kifaananyi kyennyini eky'eggwanga lyaffe leero. Tutwaaliddwa n'ekyo ekisinga okuyaayaanirwa. Awatali kubuusuusa bakabona baaloozoza nti tekijja kuba kibi, kasita gavumenti yabwe eba nga ekikkiriza. Naye ssifayo kiki gavumenti ky'ekkiriza, kiteekwa kuba nga ky'ekyo Katonda ky'akkiriza. Era abantu baaloozoza nti bijja kuba bulungi ssinga basuubirira mu bimu ku bintu byabwe eby'ensi.

10 Era omuntu ayinza okunsaba okuddamu bye nnaakamala okwogera, nti kifaananiira ddala n'olwa leero. Tuyinza obuteloozoza kuba basinza ba bifaananyi, naye kyetuli. Era ne gavumenti ekiwagira. Abantu leero basinza ba bifaananyi, kubanga ba—basinza ebifaananyi. Abamu ku bo basinza bazannyi ba ffirmu, nga ebifaananyi. Abamu basinza ssente, nga ebifaananyi. Ate abamu basinza bakazannyirizi ba televizoni, nga ebifaananyi. Naye kyonna ky'okulembeza mu maaso ga Katonda kiba kifaananyi, ka kibeere kiki kyonna.

11 Ne Setaani, omulabe waffe omukulu, mukalabakalaba nnyo, okutuusa nti ateeka, ebiseera ebimu, akulembeza ekkana nga agissa mu kifo kya Katonda. Muyinza okubeera n'ekkanisa ey'ekitalo. Kiyinza okuba ekizimbe eky'ebbeeyi, oba kiyinza okuba ekibiina ky'eddiini eky'ekitalo. Era, nate, kiyinza okuba ekibiina ekinene ennyo, naye toganya kintu kyonna kutwala kifo kya Katonda, mu mutima gwo. Ekintu kyonna ky'okulembeza mu kifo kya Katonda, kiba kifaananyi.

12 Era abantu bano baakimanya nti baali tebakyali ba mwoyo nga bwe baabeeranga, mu bufuzi bwa bakabaka abalala. Era baaloozoza nti, olw'okuba baali ggwanga linnaddiini, nti buli kimu kinaaba bulungi. Era naffe bwe tutyo bwe tutuuse mu mbeera y'emu.

13 Emyezi mitono egiyise nnali njogera ne mukwano gwange omulungi. N'agamba nti, "Ow'oluganda Branham, ndowooza olumiriza nnyo eggwanga lino erya Amerika." N'agamba nti, "Bulijjo obeera owuluguma eri ekibi n'engeri Katonda gy'agenda okubonereza eggwanga lino."

14 Ne njamba nti, "Ateekwa okukikola, okusobola okubeera omwenkanya."

N'agamba nti, "Naye, Ow'oluganda Branham, werabidde nti eggwanga lino lyazimbibwa ku musingi gwa Byawandiikibwa.

Era bajjajjaffe baja wano, era Katonda ye yatuwa obusika buno. Era tuli ggwanga linnaddiini.”

¹⁵ Ne nḡamba nti, “Ebyo byonna, bituufu. Era tewali amanyi bwe nsiima ggwanga lino! Naye, laba, muganda wange, Isiraeri nayo yali yalondebwa Katonda, era n’Abasindikira ba nnabbi n’abasajja ab’ekitalo. Naye Katonda tayinza kugumiikiriza kibi. Yaleetera Isiraeri okukungula buli nsigo gye baasiga. Era oba nga yaleetera Isiraeri okukungula kye baasiga, naffe Ajja kutukunguza ebyo bye tusiga. Tasosola mu bantu.”

¹⁶ Era tutuuse mu kifo we tulowooleza nti olw’okuba tweyinulidde kw’ebyo bajjajjaffe bye baakola, oba abatandisi b’amakanisa gaffe ab’amaanyi, okweyayo kwabwe okw’ekitalo eri Katonda bwe kwali, nga byonna birungi era bisimibwa nnyo ddala, naye tetuyinza kufuna bulokozi okuva mu ebyo bye baakola! Obulokozi nsonga ya ssekinnoomu wakati wa buli muntu ne Katonda. Ssi na ggwanga lyaffe, na kkanisa yaffe, wabula ffe bennyini mu maaso ga Katonda, gye twanukula.

¹⁷ Kituuse ku ssa mu ggwanga lyaffe, nga mu makkati g’abantu abasingayo okuba ab’omwoyo be tulina, ogenda eri abasajja n’abakazi ab’omwoyo, n’okizuula nga mu mitima gy’abwe waliwo ekibulamu.

¹⁸ Tubadde, mu sabbiiti ntono eziyise, mbadde mpitaayita mu bimu ku bintu bino, ne nkizuula nti mu basajja be nnalowooza okubaamu omulamwa, kyokka ne nzuula nga essira balitadde ku bintu ebiggwawo, nga bagenda bagamba nti, “Katonda ampadde *kino-na-kiri* ebisinga obunene. Katonda ampadde...” Obeera oguumaaza buguumaaza.

¹⁹ Ebintu ebikwatikako ebyamaanyi tebitera kubeera mu kwagala kwa Katonda. Katonda atonnyesa enkuba ku balungi ne ku babi. Naye ensi kye yeetaaga leero ssi kwe kukkiriza okwa kiguumaaza, okugezaako okweguumaaliza mu kintu n’okiyita eky’omwoyo.

²⁰ Ebiseera ebimu okukkiriza kujja kukola eby’amagero eby’amaanyi, naye nga era tebivudde mu mutima ogw’omwoyo. Mukama waffe teyayogera nti, “Bangi balijja Gyendi, ku lunaku luli, nga bagamba nti, ‘Ssaakola *kino* na *kiri*, mu Linnya Lyo?’ Era ndibaatulira nti, ‘Muve wendi, mmwe abaakola eby’obujeemu.’” Obujeemu kye kiki? Kye kintu ky’okola nga omanyi ekituufu kyokka n’otakikola. “Ssibamanyangako,” bw’Alibagamba. Era tuli mu kiseera ekyo.

²¹ Kye twetaaga leero ssi bintu ebingi ebikwatikako. Ebyo tubirina. Tetwetaaga makanisa matutumufu. Tetwetaaga bibiina by’abagoberezi binene. Tetwetaaga kubeera nnyo ku leediyo na ku televizoni. Tetwetaaga kwongerwako nnyo bintu bino. Naye kye twetaaga leero, okuba ab’omwoyo, ye muntu ajja okwetowaza mu maaso ga Katonda, ne bw’aba nga talina wadde ennuu, asabe okutuusa nga omwoyo ali munda ye

amatiziddwa n'obulungi bwa Katonda, ne wabaawo okudda obuggya munda mu mutima gwe, ekyo kikyuuusa endowooza ye n'embeera mw'atambulira.

²² Oyinza obutaba wadde n'omugogo gw'engatto mu bigere byo, oyinza okuba nga oyambadde nziina, naye nga waliwo ekintu mu mutima gwo ekiyimba ennyimba za Katonda. Waakiri mbeera n'ekyo okusinga okubeera n'ensimbi zonna ez'omunsi.

²³ N'olwekyo toyinza kugamba nti ebintu by'ensi bulijjo ke kabonero k'omukisa gwa Katonda. Dawudi ekyo yakigamba Mukama, nti yalaba omubi nga ayanyizza e...nga omuti omugimu. Naye Katonda yamubuuzza nti, "Wali olowoozezza ku nkomerero ye?" Ssi nsonga oba twambala engoye ennungi okwenkana wa, oba tulya bulungi okwenkana wa, ebyo ssi bye bigenda mu Maaso ga Katonda. Omubiri guno gwe tubeeramu, gusaanawo, ne bwe gulabirirwa gutya. Naye emmeeme eri mu muntu; embeera y'omwoyo y'egenda mu Maaso ga Katonda omulamu.

²⁴ Naye tubitwala nga eby'okusaaga. Tulowooza nti olw'okuba tuli ggwanga. . . Bwebatyo Akabu ne Isiraeli yonna, mu biro biri, bwe baabitwala nga eby'okusaaga, nti buli kintu kiri bulungi. Ba kabona baabwe n'ababuulizi baabwe baali baagezaako okubagamba nti, "Mirembe. Buli kimu kiri bulungi." Naye baalinayo omu, eyawakanyizanga ddala ekikyamu, kubanga ono yali amanyi nti Katonda omutukuvu tayinza kumatizibwa na nkola ez'omulembe ez'eddiini etali ntukuvu.

²⁵ Bw'atyo Katonda ow'omu Ggulu bw'asigala kye kimu ne leero. Mu kufuba kwaffe kwonna n'ebintu eby'amaanyi bye tugezaako okukola, Katonda talisanyusibwa kirala kyonna ekitali bulamu obutukuziddwa ddala mu maaso Ge.

²⁶ Tuyinza okuzimba amasomero, n'ebiggwa, n'amakunjaaniri. Tusobola okuba n'ebibiina. Tuyinza okukola ebintu ebikulu, naye ate nga Katonda tajja kumatizibwa okutuusa nga emeeme y'omuntu efuuse etukuziddwa ku kyoto kya Katonda, nga eyawuliddwa okukola emirimu gya Katonda. Ate ekintu bwe kityo tekikyasangika.

²⁷ Osanga enkujja zaffe ez'okusaba nga nnaffu nnyo, eddakiika nga emu yokka ey'okusaba, ne tubuukira ekitanda. Tukizuula nti ekyo kibaawo omulundi nga gumu oba ebiri olunaku. Nga, ffenna omusango gutusinga. Eggwanga lyaffe, mu mpisa, livunda. Tulina ba Billy Graham ne ba Oral Roberts buli wamu. Naye okutuusa nga wazeewo ennyonta mu mutima gwa Amerika, okugikomyawo eri Katonda omulamu nate, eri obumanyirivu obulamu, eri okukkiriza okutafa mu Katonda omulamu, tutawaanya butawaanya bwongo bwaffe, nga, enjogera bw'eri.

²⁸ Tuyinza okutambula nga ebifuba byaffe biri bweru, nga ebitogi byaffe tubitunuzza emabega, ne tutambula ku nguudo,

nga twagala okuyitibwa “Dokita” oba “Levirandi.” Tuyinza okusumba ekkansa ezisingayo okuba ez’amaanyi mu ggwanga, era tuyinza okuba abegendereza nga bwe kisoboka, nga tewali na muntu ayinza kusonga lunwe ku bulamu bwaffe. Naye okutuusa nga emeeme eri munda mufte eri ku muliro olwa Katonda, okutuusa nga munda muli, mulimu ekintu ekimuyaayaanira! “Nga empeewo bw’ewejjaweja nga enoonya akagga, emeeme yange erumwa ennyonta ku lulwo, Ai Katonda.” Okutuusa nga tutuuse ku bumanyirivu obufaanana bwe butyo!

²⁹ N’olwekyo, obwa nnaakalyak’ani, n’ebirala, bijja kweyongera mu maaso okuwamba nga bwe bikola, era n’okwegatta kwonna kwe tuyinza okukola tekusobola kukiziyiza. Kyalangibwa nti kiribaawo. Naye Katonda ayita Ekkansa Ye.

³⁰ Omukazi ono nga ateeddwa okuba nga yali wa ngeri nga eya Eriya! Kubanga, bulijjo ebikolwa byo bye biraga kiki ky’oli. Ate, era, yali yalondebwa okulabirira nnabbi wa Katonda. Jjukira nti, yali Munnaggwanga, si Muyudaaya.

³¹ N’ensi yali esiriira. Era awatali kubuusabuusa omukazi ono, nga bwe yali ow’engeri eyo, ey’ekika ky’omukkiriza. . . Kubanga tulaba nti Katonda teyandimuyise, singa si ye yali asaanidde okulabirira nnabbi wa Katonda. Kubanga teyandisindise nnabbi We mu maka agatasaanidde.

³² Tekwali kusalwo kwe. Kwali kusalawo kwa Katonda. Omukazi si ye yamusaba. Katonda ye yamulagira. Yali yatekebwa ku kagga. Ba nnamunjoona bamuliisanga. Naye kyali kiragiro kya Katonda wabewo ekibaawo. Era Katonda yagendera ddala eri omukkiriza ow’engeri yennyini nga eya Eriya.

³³ Yali mukazi nnamwandu. Era ffenna tumanyi nga omukazi oyo, nga nnamwandu, bye yali ayitamu, nga bba amaze okufa ng’ate alina omutabani gw’alina okukuza.

³⁴ Era mu nsi ezo, beesigamanga ku birime byabwe. Tebaalina pulojekiti nga ze tulina leero, ne—ne ebimera eby’okweekumisa. Besigamanga ku birime byabwe. Era olw’obujeemu bw’abantu, n’okuvunda kwabwe okw’empisa, byali bireese enjala mu gwanga, wano bonna baali balumwa enjala nga bafa.

³⁵ Era tulaba nti awatali kubuusabuusa yali asaba buli kiro, ekiro kyonna, nga alaba eppipa y’obutta ekeendera, nga ekendeera, nga ekendeera. Era kiteekwa okuba nga kyatuuka mu kiseera nga temukyaweramu yadde olubatu olw’obutta mu ppipa. Kyokka kye yalina lwali lubatu lwokka. Okufa kwali kusembedde ku mulyango, ku luggi lwe. Kubanga tewaali ngeri ndala ey’okufuna obulala. Eggwanga lyonna lyalimu enjala.

³⁶ Era, amafuta, mwali musigaddemu nga kijiiko mu kasumbi. Amafuta ago gokka n’obutta obwo bwokka bye byali wakati we n’okufa. Ateekwa okuba nga yafuuka mwesimbu nnyo mu

kusaba kwe. Ekyo leka kituuke ko ewuwo, tujja kuba beesimbu nyo okusingawo ku bwetuli amakya ga leero, bwe tumanya nti okufa kuli ku luggi.

³⁷ Era nzikiriza, oba oly'awo twandirowoozezza, ssinakindi, kino, nti yali asabye ekiro kyonna, kubanga olunaku lumu lwe lwali lubulayo. Yatunuuliranga emimwa gya katabani ke ak'emyaka essatu oba ena nga gisiwuuse. Era n'alaba amagumba ge ye nga gaggwerera, nga omubiri gugaggwaako. Era kiteekwa okuba nga kyali kintu kizibu, nga maama ono, alaba ebintu bino bigenda mu maaso. Kyokka, ate, nga emikono gye giri eri Katonda, ng'asaba emisana n'ekiro, "Kati tusigazzaawo olubatu lumu olw'obutta n'ekijiiko kimu eky'amafuta."

³⁸ Omanyi, kyewuunyisa. Leka Katonda aleetere kino okunnyikira mu buli omu ku mmwe, bwe mubanga temuzzeemu kumpulira nga mbuulira nate. Leka buno bubeere obubaka. Kyewunyisa, kyewunyisa nnyo, nti ebiseera ebimu Katonda bw'atyo bw'akola ebintu.

³⁹ Omanyi, bwetuba twaatude ebibi byaffe nga tutuukirizza buli kisaanyizo Katonda ky'ayagala...Tukkirizza Katonda. Waliwo embeera ezirina okutukkirizibwa, era kiri mu kwagala Kwe. Era twaatudde ebibi byaffe, ne tutereza, ensobi zonna ze twakola, nga tukoze buli kimu kye tumanyi okukola. Buli kisaanyizo Katonda ky'ayagala, oba ky'asaba, nga tutuukirizza ekisaanyizo ekyo, naye ate n'Asigala ng'asirise. N'atatwanukula.

⁴⁰ Nkakasa nti njogera eri abantu, amakya ga leero, abatuuseko mu mbeera bw'etyo. Ngibaddemu, emirundi mingi, nze mwene. Bwe nzizengayo nenkebera obulamu bwange ne nuunula buli jinja, ne nzuula nti waliwo kye nasobya, mbadde nga njenda ne nkyaatula ne njamba nti, "Mukama Katonda, nja kukitereza," era ne njenda ne nkikola. Ne nkomawo nate ne njamba nti, "Kaakano, Mukama, ye Ggwe Katonda; Ojja kunyanukula. Mazima ntuukirizza buli kyoyagala nkole. Na buli kisaanyizo kyonna, nkituukiriza." Kyokka n'Atabaako ky'agamba, n'alabika nga asirise, awo w'oteekedwa okubeera omukakafu nti Ye Katonda. Toggwamu maanyi. Ekintu kiri kimu, nti, mu mutima gwo, kwe kweekakasa Katonda.

⁴¹ Eky'okuyigako kyange. Weekakase, okusooka, nga tonnabaako ky'okola. Beera mukakafu, mu mutima gwo, nti Katonda. Era nga omaze okutuukiriza buli kye Yagamba, olwo oba mukakafu nti Ye Katonda, awo okukkiriza we kukolera, awo wennyini. Okukkiriza kunywera, kubanga kumanyi nti Waali.

⁴² Ng'omaze okutuukiriza buli kisaanyizo. Okkiriza nti Waali, era okukkiriza ne kunywera. O, Erinnya Lye liweebwe omukisa! Okukkiriza tekujja kusagaasagana, kubanga kukakafu nti Katonda waali, era ye mugabi w'empeera eri abo abanyiikira okumunoonya.

⁴³ Kino leka kigendere ddala mu buziba obutabavaamu, Ekkunjaniro lya Branham. Bw'oba otuukirizza Katonda by'ayagala, era nga mu mutima gwo okkiriza nti Waali, Katonda aba agezesa bugezesa kukkiriza kwo, kubanga ekyo ayagala okukikola. Oyatudde ekibi kyo era otuukirizza buli kimu Katonda kye yetaaga, kyokka n'Asigala nga asirise, jjukira nti, okukkiriza kugamba nti Waali. Olwo okukkiriza kukinywererako, nga tekumanyi lwaki, naye nga kumanyi nti Waali, era kukakafu nti Waali.

⁴⁴ Olwo, jjukira nti, bwaba nga Waali, Ebigambo Bye biteekwa okuba ebituufu. Era bw'aba yayagala oosisinkane embeera zino, era n'okikola, kimukakatako okulabirira Ekigambo Kye. Toddirira, n'ogamba nti, "Kale, ssaawonye. Nna..." O, ggwe ow'okukkiriza okutono, okunafu. Tokikkiriza ekyo. Buli kimu bwekiba kyatuddwa, era nga buli kimu kifulumizzidwa, ng'otuukirizza buli Katonda kye yeetaga, okukkiriza kunywerera awo wenyinni. Tewali kijja kukunyeenya. Waali, era oli mukakafu. "Abo abalindirira Mukama balizza buggya amaanyi gaabwe; balitumbiira waggulu n'ebiwaawaatiro by'empungu. Balidduka so tebalikoowa; bwe balitambula, tebalizirika."

⁴⁵ Lindako, nga otuukirizza ebisaanyizo Bye. Ekyo kireeta okukkiriza kwo mu kugezesebwa. Bw'oba otuukirizza... Katonda bye yetaaga nga bikoledwa, oba nga bituukiriziddwa, era nga obyetegerezza bulungi, era nga okoze buli Katonda ky'akwagaza okukola, olwo okukkiriza kwo kunywerera awo wennyini, nti Waali. Weekakase Katonda.

⁴⁶ Omanyi, ayagala okutugezesa. Ayagala okulaba okukkiriza kwo kye kugenda okukola. Ekyo obadde okimanyi? Katonda ayagala okulaba engeri gy'ogenda okweyisaamu. Bw'ogamba nti, "Ai Mukama, nkukkirizza. Ggwe Mulokozi wange. Nzikiriza nti Ggwe Muwonya. Nzikiriza nti Ye Ggwe agaba Omwoyo Omutukuvu. N'ebintu bye nneetaaga, Ggwe Katonda abigaba." Awo bw'oyatula ebibi byo n'osuubiza Katonda by'ojja okukola bw'Anaaba nga akulese n'otereera, kati olwo bwe kitabaawo, n'olyoka oddukira awalala ng'omutiitiizi. Katonda tayinza kukoza ekyo. Tewali ngeri gy'Ayinza kukukozesa. Tewali ngeri gy'Ayinza kukwaanukula, kubanga Ayanukula kuyita mu kukkiriza kwokka. Olwo, mbagirawo, n'ovaawo, n'Atayinza kukwanukula. Naye, okukkiriza kwennyini okw'amazima kunywerera awo, nga kukakafu nti Katonda waali. Kakasa nti Waali.

⁴⁷ Era Katonda bw'asaba ekintu kino kikolebwe, okwatula ebibi byo, n'ebirala, era nga okikoze, okukkiriza kugamba nti Waali, kukakafu nti kigenda kubaawo. Ekyetaago kyo kiteekwa okukuweebwa. O, nsu—nsuubira ekyo temugenda kukisubwa. Bw'oba nga weekakasa Katonda, Katonda yeekakasa Ekigambo Kye. Alindiridde bulindirizi kukugezesa.

Akikoze emirundi mingi. Leka twejjukanye ku mulundi gumu oba ebiri.

⁴⁸ Leka tulwooze ku baana Abaebbulaniya. Tebaali ba kuvunnamira kibumbe. Katonda yabalinamu obwesige. Era bwe baawulira nti baali bagenda mu kikoomi ky'omuliro, ne bagamba nti, "Katonda waffe asobola okutulokola mu kikoomi kino. Naye bw'Ataakikole, tetujja kuvunnamira n'ekimu ku bifaananyi byamwe." Olaba, baali bakakafu era nga beekakasa Katonda.

⁴⁹ Baali bamanyi nti Ye Yakuwa. Baali bamanyi nti addamu okusaba. Naye oba nga ayanukude mu nsonga yabwe, oba nedda, kyalina kuba kulwa bulungi. Kale baikola okwatula kwabwe, ne baatula ebyonoono byabwe, ne batambula nga bagenda mu okufa.

⁵⁰ Bwe baali bagenda eri ekikoomi ky'omuliro, nga bamanyi nti baali bakakafu, nti, Katonda bw'abaleka ne bassirikka, Wa kuddamu abazuukize nate, mu kuzuukira. Baali beekakasa Katonda, kubanga baali bamanyi nti Katonda ajja kukola buli kimu ku lw'obulungi bwabwe. Era bwe tuba nga twekakasa Katonda, tumanyi nti Katonda akola buli kimu olw'obulungi bwaffe.

⁵¹ Bwebatyo, baayogera kimu. Baali bakakafu, era ne boolekera ekikoomi ky'omuliro. Era Katonda yabaleka ne bakyolekera; nga asirise, abatunuulidde. Nga ayagala alabe kye bagenda okukola.

⁵² Kabaka, bwe yabuuza nti, "Mwavunnamyee ekkondeere bwe lyavuze?"

Ne bagamba nti, "Nedda. Tetwavunnamyee." Okwo kwe kukkiriza kwo, nga kunywedde.

"Kale, kaakati, bwe muba nga temwavunnamyee, mumanyi ekiragiyo kyange?"

"Wewaawo, ekiragiyo kyo tukimanyi."

"Ekiragiyo kyange kiri nti ekikoomi kijja kwaaka emirundi musanvu okusinga bwe kyali kyaase, era nja kubakasukamu. Mwandiyagadde kati okuvunnama?"

"Nedda. Tetujja kuvunnama." Okwo kwe kukkiriza kwabwe.

⁵³ Katonda n'agamba nti, "Kale, ka ndabe kye bagenda okukola. Ka ndabe okukkiriza kwabwe kye kugenda okukola."

⁵⁴ N'agamba nti, "Mubasibe emikono, mubasibe n'amagulu, mubatwale eri ekikoomi." Ne boolekera ekikoomi, n'omuliro nga gubali mu maaso. Katonda nga akyayimiridde, yetegereza. Naye baali bakakafu nti Yali Katonda. Baali bakoze okwatula kwabwe. Baali baaterezezza buli kimu, kye baali bamanyi. Baali bakakafu nti Ye Katonda.

⁵⁵ Ne batambula butereevu nga boolekera ekikoomi ekyo eky'omuliro. Mu kaseera kennyini akasembayo, n'Ajja nga yebagadde okuva mu ggulu, ku gaali ey'embuyaga, n'abafuwako empewo empeweevu, nga bw'ababudaabuda ng'ayogera nabo.

⁵⁶ Katonda aleka okukkiriza kwo ne kutuuka mu kifo we kubaako kye kukola.

⁵⁷ Waaliwo Yobu, ow'Endagaano Enkadde, Sitaani, atuloopa, bwe yamuloopa nti mwonoonyi owo mu kyama. Naye Yobu yali amanyi nti yali tayonoonye. Yali amanyi nti yali ayatudde buli kimu kye yali yakola, era ng'awaddeyo n'ekiwebwayo eky'okebwa. Ekyo Katonda kye yali yeetaaga. Ekyo kyokka Katonda kye yali yeetaaga, ky'ali ekiwebwayo ekyo eky'okebwa n'okwatula. Era Yobu ebyo yali abikoze.

⁵⁸ Sitaani n'agamba nti, "Nja kutwaala ennamira ze, kubanga musajja mugagga. Nja kutwala endiga ze." Ekyasembayo n'atwala abaana be, abaamuli ennyo ku mutima.

⁵⁹ Era, Yobu yagaana okukyusa endowooza ye, kubanga yamanya nti Katonda, kubanga, yali mukakafu nti Ye Katonda, kubanga yali yayogera naye, era yali atuukirizza ebisaanyizo Bye. Yanoonyerereza ddala n'akakasa nti, "Mpaddeyo buli kiwebwayo ekyokebwa. Nnayogera mu mutima gwange nti, 'Oba oli awo batabani bange bwe bakola e—embaga, ne bawala bange ne bagyetabamu, oba oli awo bayinza okuba nga baayonoona mu kyama mu mitima gyabwe, n'olwekyo nja kuwaayo ekiwebwayo eky'okebwa ku lwabwe njatule okusobya kwabwe."

⁶⁰ Ai Katonda! Omuntu bwe yekuuma Katonda kye yagamba okukola, aba mukakafu nti Ye Katonda, Ateekwa okw'anukula. Okukkiriza kumuyita n'alabisibwa, bulijjo.

⁶¹ Bw'oba ng'okoze ky'omanyi okuba ekituufu, ng'otuukirizza ebisaanyizo Bye, ng'oyatudde era n'otereeza, n'ozzaayo ebyetaagisa, n'okissa mu maaso ga Katonda. Sifaayo oba asirika kwenkana wa, asigala Ye Katonda, ng'alindiridde okuteekawo okukkiriza okwo. Okoze ebikolwa byo, kati Ayagala okulaba okukkiriza kwo olw'ebikolwa byo. Ayagala okulaba kiki ky'ogenda okukola.

⁶² Bw'oba osiigiddwa amafuta n'osabirwa, Katonda alindiridde okulaba kiki ky'onokkiriza ku nsonga eyo. Ssi kudduka ku Ssande ejja, n'odduka ne ku lunaku oluddako, ne lwe wanakyala asabira abalwadde omulala mu kibuga. Alindiridde kulaba kiki ky'onookola ku kukkiriza kwo. Ssi kukomawo, enkeera, n'ogamba nti, "Mpulira bubi nnyo, ssirowooza nti nnawonye." Okusooka kwa byonna, tosaanidde na kubeera mu lunyiriri lw'abagenda okusabirwa. Tonnaba. Tonnaba. Tonnabeera, mwetegefu. Tokkiriza nti Ye Katonda. Ssi...

⁶³ Oyinza okugamba nti, "Ow'oluganda Branham, ssikkiriziganya naawe." Ebikolwa byo byennyini bye bikakasa

ky'oli. "Mulibamanyira ku bibala by'abwe." Omuntu bw'agamba nti Mukulistayo, kyokka nga akyanywa omwenge, n'okufuuwa sigala, nga azannya zzaala, ng'abalaata ebitasaana, ng'agamba nti, "Ekitundu kya Baibuli ekimu kituufu, ate ekirala ssi kituufu." ayinza okubuulira Enjiri, kyokka ne yegaana ekitundu ku Baibuli, akyali mwonoonyi. Tannaterera, tannaba.

⁶⁴ Naye bw'oyatula mu lwaatu nti Katonda ye Katonda y'omu, nga n'obulamu bwo buteekeddwa mu mikono Gye, kibeere nti, "Mukama, nze bbumba; Ggwe Mubumbi," olwo saba ky'oyagala. Okukkiriza tekuliseesetuka. Kujja kusigala awo wennyini.

⁶⁵ Newankubadde nga embeera erabika nga etabuse ku ddyo ne ku kkono, naye okukkiriza okwo tekuseesetuka, kubanga okakasa nti Ye Katonda. Era bwaba nga Ye Katonda, Akuuma ekisuubizo Kye. Tasobola kukola kisuubizo ate n'akimenya. Bwaba Katonda, Ateekwa okukuuma ekisuubizo Kye. O, nkyagala ekyo. Ateekwa okukituukiriza.

⁶⁶ Yobu yawaayo ebiweebwayo bye; yakola buli kimu. Yali akimanyi nti mutuufu. Ne wajja ba mmemba b'ekkanisa, agamu ku makanisa ag'ebibiina by'eddiini amalala, ne bagamba nti, "Yobu, wandyatudde bw'oli omw'onoonyi nalwo ne luggwa, kubanga Katonda teyandikulese kubonerezebwa bw'oti ssinga tobadde mwonoonyi."

⁶⁷ Naye Yobu n'agamba nti, "Nnayatula dda. Nnawaayo dda ekiweebwayo eky'okebwa mu maaso ga Katonda, era ssiri mwonoonyi." Yali amanyi w'ayimiridde. Olwo buli kintu ne kigenda mu maaso, ne by'eyongera bweyongezi nnyo, nga byeyongera kuzibuwala, nga bigezaako okussa wansi Yobu, n'okutuusa Yobu w'ayinza okwegaanira Katonda n'okwegaana ekiweebwayo ekyo eky'okebwa. Akaseera kennyini w'okolera ekikontana n'okwatula kwo, kyoleka obunafu bwo, okubusabuusa kwo mu Katonda. Osaba Katonda ekintu kyonna, ate n'ogenda nga okibusabuusa, olwo oli muntu abususabuusa sso ssi mukkiriza.

⁶⁸ Yobu yali amanyi w'ayimiridde, era yayimirira ng'annyweredde ku musingi ogwo.

⁶⁹ Tekyewuunyisa Perronet yagamba, mu kaseera ke ak'okufa nti:

Ku Kristo, Olwaazi olugumu, kwe
nnyimiridde;
Awalala wanna musenyu ogukka.

⁷⁰ Ku lwazi olwo olugumu olw'okwatula kwa Yobu, ne mukyala we omwagalwa yamwabulira. Obulamu bwe nga busaanyewo, ng'amayute gamubunye yenna, ne yeekwagula n'akolimira olunaku kwe yazaalirwa. N'agamba nti, "N'enjuba erekeyo okwaaka! Omwezi gusigale mu nnyanga ekiro."

Mukyala we n'agamba nti, "Yobu, enaku ekuyinze. Lwaki tokolimira Katonda n'ofa?"

⁷¹ N'amuddamu nti, "Oyogedde ng'abakazi abasirusiru bwe boogera." Yali mukakafu nti waliyo Katonda, era nga yali atukirizza ebisaanyizo. O, mpulira nnyingidde mu mwoyo. Yali amanyi nti atukirizza Katonda by'ayagala, era ekyo kimala. Katonda yali agezesa kukkiriza kwe. Ajja kugezesa okukwo. Ajja kugezesa okwange.

⁷² Naye bwe tuba nga tutukirizza by'ayagala, "Mwenyenye buli omu ku mmwe mubatizibwe mu Linnya lya Yesu Kristo olw'okuggibwako ebibi byammwe, era munaweebwa ekirabo eky'Omwoyo Omutukuvu," ekyo kye kisuubizo Kye. "Waliwo mu mmwe omulwadde, ayite abakadde b'ekkanisa. Bamusiige amafuta, era bamusabire. Okusaba okw'okukkiriza kunaalokola omulwadde, era Katonda anaamuyimusa." Ekyo kimala. "Mwatuliraganenga ensobi zammwe, mwekka na mwekka, era musabiraganenga." Otuukirizza Katonda bye yetaaga.

⁷³ "Obubonero buno bunaagobereranga abo abakkiriza. Mu Linnya Lyange banaagobanga emizimu; banaayogeranga ennimi empya; bwe banaakwatanga emisota oba bwe banaanywanga ekintu ekitta, tekiibakolenga kabi; bwe banaateekanga emikono gyabwe ku balwadde, banaawonanga." Ekyo kimala.

⁷⁴ Weekakase Katonda. Kakasa, nti mu mutima gwo, nti okkirizza nti ekyo Kigambo kya Katonda. Yobu bweyali.

Mukyala we n'agamba nti, "Lwaki tomukolimira n'ofa? Ndaba, weyongerera kuba bubu buli kiseera."

⁷⁵ Ekyo nga Sitaani ayagala nnyo okukikulaga. "Ndaba, tolinaawo njawulo na bwewali okuva lwe wasiigibwa amafuta. Tolinaawo njawulo na bwewali okuva ababuulizi abo lwe baakusabira. N'okusookera ddala, ababuulizi abo si batuufu." Omubuulizi oyo si ye nsonga. Ekikulu, kwe kukkiriza kwo mu Katonda omulamamu. Si ekyo omubuulizi ky'ali; wabula Katonda ky'ali. Omubuulizi ssi ye yasuubiza; Katonda ye yasuubiza. Tekiri eri mubuulizi; kiri eri Katonda, n'okukkiriza kwo okukkiriza nti oyo Katonda. N'olwekyo weekakase Katonda. Kakasa nti ye Katonda, era nti ekyo Kigambo kya Katonda. Era Katonda ali mu Kigambo Kye.

⁷⁶ Yobu n'agamba nti, "Oyogera nga omukazi omusirusiru." N'agamba nti, "Mukama ye yawa, era Mukama y'aggyewo; Erinnya lya Mukama lyebazibwe." Yali mukakafu nti waliyo Katonda.

⁷⁷ Era olwafulumya ekyo mu kamwa ke bwati, okubwatuka ne kutandika okuwuluguma n'ebimyansa ne bitandika okumyansa. Katonda n'ajja n'alabika. Bulijjo kimuleeta n'Alabika. Yasirika okumala ebbanga ddene.

78 Ekyo ky'Akola. Tunuulira Abamerika bano aboolekedde ggeyeena, bannanfuusi abagenda obugenzi mu kkanisa. Ssisunguwade. Naye ekibi kinyiiza omuntu yenna ateredde ne Katonda. Ssisunguwalide ggwanga, ssisunguwalide bantu, wabula nnina obusungu eri sitaani aleetedde ebintu bino okuziba abantu amaaso.

79 Abasumba n'ababulizi bano abazibe b'amaaso n'abaleetera okuyinaayina n'enjigiriza y'eddiini eyagunjibwawo abantu. Oteekwa okuzaalibwa omulundi ogw'okubiri. Era Katonda akuuma Ekigambo Kye. Mulaba nga abanafuya. Osaanye okakase nti waliwo Katonda. "Nga balina ekifaananyi eky'okutya Katonda, naye nga beegaana Amaanyi gaakwo."

80 Omukazi ono omutono, omwavu, yamanya nti Yali Katonda. Eppipa eyo bweyakendeera, n'ekendeera, n'ekendeera, n'ekendeera, embeera ne yeeyongera okwonoonekanga, buli olukya. Naye Katonda y'abireka okubeera bwe bityo. Ekyo ayagala nnyo okukikola. Ayagala okugezesa okukkiriza kwo, alabe ky'ogenda okukola, akuleka ne bakusiiga amafuta n'osabirwa, olwo embeera yo n'agyongera okuba embi. N'agamba nti, "Jjangu, Sitaani, mugezese. Mmanyi anzikiriza." Katonda yebazibwe emirembe n'emirembe! O, bannange! [Ow'oluganda Branham akuba mu ngalo emirundi ebiri—Omuk.] "Kati mugezese. Mmanyi akkirizza Ekigambo Kyange nga bwe nnakyogedde." Ayinza okukwogerako bw'atyo?

81 Ekyo yakyogera ku Yobu. N'agamba nti, "Mukole kyonna ky'oyagala, naye totwala bulamu bwe, kubanga nkimanyi nti anjagala. Awaddeyo ekiweebwayo ekyokebwa. Atuukiriza ebisaanyizo. Akoze kye nnamugamba okukola, era akikkiriza. Kati oli wa ddembe okumukolokota bw'oba oyagala." Yamujjako buli kintu. Katonda yabikubisaamu emirundi ebiri bwe Yabimuddiza. Nkakasa, Ajja kukikola.

82 Agezesa okukkiriza kwaffe, okulaba oba ddala tukkiriza nti Ye Katonda.

83 Mukazi wattu oyo, kyeyava agamba, nti, "Nnasabye. Nnasabye. Mmanyi ndi Munnaggwanga atasaanidde."

84 Jjukira nti, Yesu yamwogerako mu Baibuli. Yagamba nti, "Tewaaliyo bannamwandu bangi mu nnaku za Eriya? Naye yatumbwa eri omu, ate nga yali Munnaggwanga."

85 "O," n'agamba nti, "nsaba." Oba oli awo, bwe yalaba akagaati ako akaali kasembayo, okufa kwaali kuyingidde mu wankaaki nga kutuuse ku luggi. Akamere ka lulya lumu, buli omu ku bbo, ye ne mutabani we bafe. Nkubamu akafaananyi nga mmulaba, ekiro kyonna, nga asaba, embuyaga ez'ebbugumu nga zikunta, n'ensi ng'ekaze nnyo, nga n'abantu bakaaba nga balaajana mu nguudo. N'atambulatabula, mu nnyumba wonna. N'atunuulira katabani ke. N'atunuulira obugoye bwako obusulwamu; nga bwonna bulebera, n'obugere

bwako nga busowoseeyo. N'atunuulira emikono gye, nga gifungaladde. N'atambulatabula nga adda eno n'eri, naye n'agamba nti, "Mmanyi nti Ye Katonda. Nnayatudde ebibi byange byonna. Nkoze buli kimu kye yeetaaga. Nsaba bulamu bwaffe, olw'ekitiibwa Kye." Katonda n'amulaba.

⁸⁶ Abasigade baali bagenda mu mazina awantu awamu, nga beekolako, nga bwe balaba eby'omulembe ebilangibwa ku televizoni oba ekifaananako bwe kityo, nga beejeeguula n'ensi. Naye omukyala oyo yali mu kweyawula ne Katonda.

⁸⁷ Obudde ne bukya. N'agamba nti, "Omuto yasuze akaabira eky'okulya ekiro kyonna. Olubatu olumu lwokka olw'obutta nnaalufumbamu ki?"

⁸⁸ Omanyi, obutta obwo yali Kristo. Buli muyizi wa Baibuli akimanyi nti Kristo ye yali ekiweebwayo-eky'Obutta. Era obutta obwo bwaaseebwanga ku lubengo lwa mannyo ga njawulo, nabwo, okutuusa lwe lwayasaayasanga buli kaweke k'enjano mu ngeri y'emu; kubanga Yesu Kristo aba bumu, jjo, leero, n'emirembe gyonna. Era buli mukkiriza akkiriza ekyo era ku kyo kw'awummulira. Alleruya! Oli wa ddembe okusigala n'ediini yo gy'oyagala, enkadde empolu ey'okutuukiriza obutuukiriza emikolo. Naye nze, nzikiriza nti Kristo aba bumu jjo, leero, n'emirembe gyonna. Nkinyweza mu nnamungi w'abakaafiiri. Nkyakkiriza nti Ye omu jjo, leero, n'emirembe gyonna.

⁸⁹ Amannyo g'olubengo gali gaaseeranga ddala buli mpeke mu ngeri y'emu, kubanga Aba bumu. Ye Katonda y'omu nga bwe Yali luli, bw'Ali kati, amakya ga leero. Bulijjo ajja kuba bumu. Ekyo obutta kye bwali butegeeza.

⁹⁰ Ate amafuta gategeza Mwoyo, nga bwe tumanyi okusenziira ku Ezekyeri 4, n'okweyongerayo. Eyo ye nsonga lwaki tusiiga amafuta; ye Mwoyo. Kye kiki? Nga mu njiri ya Yokaana Omutukuvu 4 nti, "Kitaffe anoonya abali ng'abo okumusinja mu Mwoyo ne mu Mazima." Yesu ye yali Amazima. Ye yali ekiweebwayo eky'Obutta, era amafuta gano ge gaali Omwoyo. Era Omwoyo, ng'atabuddwa wamu n'Amazima, biteekwa okubaako kye bireeta. Bigatte wamu, bikola omugaati. O!

⁹¹ Okukkiriza kwo kuli wa? Ekigambo kya Katonda bwe kibuulirwa mu ngeri Yakyo ennyangu, weewawo mu Maanyi Gaakyo, nti Yesu Kristo aba bumu jjo, leero, n'emirembe gyonna, era Ekigambo ne kifulumu nga bwe Butta, olina Amafuta ag'okukitabulam. Buyinza okuba nga bwa lubatu bubatu, oba nga gajjuza kajiiko bujiiko, naye, kyonna kye kiri, kya nnamaddala.

⁹² Kati kirindiridde ki? Kirindiridde musaalaba. Kirindiridde okweyayo nga ssaddaaka. Ekyo ky'olina okukola. Ekigambo bwe kiba nga kibuuliddwa, n'oddira Omwoyo na Kyo ne bitabulwa wamu, kuba kwewayo nga ssaddaaka okugaana

buli bulumi, okugaana buli ndwadde, okugaana buli kintu ekikontana n'Ekigambo kya Katonda, n'okiyimirirako.

⁹³ Omusawo agamba *kino, ekyo*, oba *kiri*; tekikola njawulo n'akatono. Kiyimirireko, kubanga Katonda ye yakyogera. Obutta buubuno. Amafuta ogalina. Obigasse wamu.

⁹⁴ Kati, mpulira eddoboosi. Obudde nga bwakakya. Eddoboosi ne lyogera, nga ligamba nti, "Genda ebweru mu luggya ofuneyo enku bbiri." Okiraba nti, Ekyawandiikibwa kigamba "enku bbiri"? Omusaalaba. Alina obutta n'amafuta, naye agenda kuyitibwa, okukolerawo; abeeko ky'abikozesa. Byonna by'olina, Obutta n'Amafuta byonna bye weetaaga, naye olina okukola; nga wewaayo nga ssaddaaka.

⁹⁵ Obuku bubiri. Edda tebaalina ngeri ya kukuma muliro esingako awo. Bw'oddira oluku n'olukiika ku lulala, n'okoleeza wakati, n'oseesaamu erudda n'erudda, Abayindi bwe baakumanga bwe batyo omuliro gwabwe. Nange ngukumyeko, emirundi mingi, ekiro kyonna. Oddira ekisiki, n'okitunza eno, n'ekirala eri, n'osigala nga okisindika mu muliro nga bwekyaaaka.

⁹⁶ Oluku olwo gwe gwali omusaalaba. "Enku bbiri," Baibuli bw'egamba. Eddoboosi lyagamba nti, "Yita mu luggya onoonyeyo enku bbiri." Mu kiseera kye kimu, ku lusozi, waaliwo eddoboosi ery'abwatuka eri nnabbi nga ligamba nti, "Genda mu kibuga. Ndagidde." O, bannange! Bombi baagonda. Wateekeddwa okubaawo ekibaawo. Bombi baagonda.

⁹⁷ Omubuulizi bw'abuulira Ekigambo, n'oyo akiwulira n'akikikiriza era n'akiteeka mu nkola, wateekweddwa okubaawo ekibaawo. Bw'oba oli mwonoonyi, ojja kulokolebwa. Bw'oba oli mulwadde, ojja kuwonyezebwa, kubanga Katonda yakisuubiza, bwe tuba nga tweekakasa Katonda.

⁹⁸ Nga bwe kiri ekikakafu nti Ye Katonda, Ateekwa okukuuma Ekigambo Kye. Kikakafu! Kati ekiragiro kyali nti, "Genda mu kibuga, kubanga ndagidde nnamwandu." Okwolesebwa ne kujjira nnabbi. Wuuno ajja, ng'atambula. Tamanyi wa gy'alaga; naye eyo ssi nsonga. Ye agondera bugondezi.

⁹⁹ Tamanyi nku wa waanazisanga ziri, naye waliwo enku bbiri awantu awamu ebweeru eyo. N'asimbula. N'agenda ebweru okwetooloola awaka. N'anonyanoonya, "Ha, nga ebbugumu lingi!" Oluyogaano okuva mu kibuga, bakyalakimpadde b'ekiro nga bajja, nga eno bwe bagwirana, nga banywa emyenge gyabwe, n'ebirala. N'atunula wansi mu luguudo. N'atalaba kintu. N'azuula oluku lumu; ekitundu ky'omusaalaba, nga kwe kweywayo nga ssaddaaka. N'afuna ekitundu ekirala, oluku. Era bwe yalonda oluku olwo olw'okubiri. . .

¹⁰⁰ O, embeera eteekwa okuba nga yali mbi, okufa nga kuli ku luggi. Ye ne mutabani we baali basigazizza kulya katundu

k'akagaati bafe. Kyali kiwedde. Era ebiseera ebimu, wakati ddala mu nnaku, we tuwulirira eddoboosi.

¹⁰¹ Bwe yalonda oluku olwo olw'okubiri n'asimbula okuddayo, ne wabaawo eddoboosi eryogera nga lizinziira ku wankaaki, ne ligamba nti, "Nkimiraayo otuzzi mu kibya."

¹⁰² N'akyuka okulaba, ng'akutte enku zino ebbiri mu mukono gwe, n'obutta n'amafuta wamu nga biwedde okutabulwa. N'agamba nti yali amaze okubiteekateeka, nga abitabudde wamu. Ekyo kye, Ekigambo n'Omwoyo, birina okwetabula awamu. Weyale ku musaalaba ogw'okweewayo nga ssaddaaka, okugaana buli kintu ekikontana ne ky'osabye. Ekyo kituufu. "Nabitabudde, kati njenda kunoonya nku zino."

Eddoboosi eryo ne ligamba nti, "Ndeetera ku tuzzi otw'okunywa, mu kibya."

¹⁰³ N'atunula, n'alaba omusajja nga ayimiridde, nga yesigamye ku wankaaki, nga wa mba ntonotono, alina ebirevu, wa kiwalaata, ng'atunuulidde okwolekera wankaaki, nga yesibye akatundu k'eddiba ly'endiga akakadde. Ng'alabika nga omusajja omukadde omuntumulamu ow'ekisa.

¹⁰⁴ N'agamba nti, "Nja kugabana naye amazzi gange." Amazzi ag'Obulamu, nga oli mwetegefu okugawa omuntu yenna, okubuulira omuntu yenna, okugenda awantu wonna. "Lindako katono, ssebo." N'asimbula okuddayo, n'enku mu mukono gwe.

¹⁰⁵ Eddoboosi ne libwatuka nate nti, "Ssi kugabana ku mazzi go gokka, wabula ndeetera n'akamere mu mukono gwo." Omugaati gw'obulamu; amazzi ag'obulamu! Byali bya bulamu? Yali wa kufa amangu ddala nga biwedde. "Ndeetera amazzi go ondeetere n'omugaati gwo."

¹⁰⁶ Kiki kye tuzuula wano? Kya kuyiga ki kye tuyinza okufunawo? "Sooka onoonye Obwakabaka bwa Katonda, n'obutuukirivu Bwe bwonna; ebirala binaakwongerwako."

"Ndeetera otuzzi tutono n'akatundu k'omugaati."

¹⁰⁷ Awo n'akyuka, mu nnaku ye. Nsobola okumuwulira ng'agamba nti, "Ssebo," mu ngeri nga eno nti, "oli wa njawulo ku basajja be nnali ndabye, n'abasajja be nnali mpulidde nga boogera. Olabika okakasiza ddala ky'ogamba. Naye obutta bwe nnina bumala bumazi, bwa lubatu bubatu, n'akajiiko k'otufuta. Mmaze n'okubiteekateeka, era njenda kubifumba n'enku zino ebbiri. Era njenda kubirya, nze ne mutabani wange, tufe. Ekyo kyokka kye nninawo."

¹⁰⁸ Kiki kye tuddako, awo, okuwulira? "Naye, nkimira akagaati, okusooka." Katonda, y'asooka. Ssi nsonga oba omulala yenna agamba ki, oba kiki ekirala, oba bukakafu ki obw'engeri yonna, oba embeera erabika bubi etya, ka kibe kiki, kulembeza Katonda, okusooka. Ekigambo Kye, ky'oba okulembeza.

109 “Omusawo yagambye nti ssiyinza kuwona.” Naye, Ekigambo Kye, kyenkulembezza. “Ndi mwonoonyi nnyo. Ndi malaaya. Ndi mukubi wa zzaala. Ndi mutamiivu.”

Eigambo kya Katonda, kye kisooka. “Ebibi byammwe ne bwe biba ng’olugoye olumyufu, binaaba byeru ng’omuzira; ne bwe bitwakaala nga bendera, binaaba byeru nga eby’oya by’endiga.” Katonda, y’asooka.

110 “Genda, ondeetere akagaati, okusooka. Byonna by’olina, bindeetere.” Oli mwetegefu okubiwaayo mu mikono Gye?

111 Obulamu bwange, kyonna kyendi. Nnina emyaka ataano. “Oli mwetegefu, William Branham, okugiwayo Gyendi? Muli beetegefu, mmwe abaana abato, okuwaayo obulamu bwammwe Gyendi? Muli beetegefu? Musobola okukikola, mmwe abalwadde? Musobola okunneesiga? Munkulembeze.”

112 “Ndeetera akamere mu mukono gwo, onkimire n’otuzzi.” N’amutunuulira. Waliwo ekyamugamba nti omusajja oyo ategeera bulungi ky’ayogerako.

Katonda amanyi Ababe. “Endiga . . . Endiga zange zimanyi Eddobozi Lyange. Zimanyi oba nga Kyawandiikibwa oba si kyo, oba kituufu oba si kituufu.”

113 N’akyuka, mu buwulize. Ekyo ky’olina okukola. Era bwe yakyuka, okugondera nnabbi ky’amugambye okukola, ne wajja okubwatuka okuva mu Ggulu, buli muntu kwe yandyagadde okuwulira. Kubanga, wajja okubwatuka okuva mu ddoobozi lya nnabbi, buli mwonoonyi na buli mulwadde kw’ayaayaanira okuwulira, “BW’ATI BW’AYOGERA MUKAMA.”

114 Nga tuyaayaanira Okuliwulira! Engeri abantu gye banteega we nkyaamira awaka, ne banjamba nti, “Jangu ku luggi bweruti. Muwala wange omwo *mwali*. Omwana wange omuwere, bambi, munafu nnyo. Yogera bwogezi kigambo.” Oyinza otya okukyogera nga tekinnateekebwa mu kamwa ko? Ojja kuba nga ggwe okyogedde. Naye bayaayaanira okukiwulira nti, “BW’ATI BW’AYOGERA MUKAMA.”

115 Ne lijja, okuyita mu lukomera, kubanga yali agonze. Era ennaku n’evaawo. “BW’ATI BW’AYOGERA MUKAMA. Eppipa teriggwamu, n’akasumbi tekalikalira, okutuusa ku lunaku Mukama Katonda lw’alitonnyesa enkuba ku nsi.” O, nga kubudaabudibwa!

116 N’akola omugaati. N’aguwa nnabbi. N’addayo ne yeekolera ye ne mutabani we. Ne balya era ne banywa, mu bungi, ku nsi.

117 Byava wa? Byatuuka bitya awo? Mu magezi ga ssayansi mbuulira obutta obwo gye bwava. Amafuta ago gaava ludda wa? Gaatuuka gatya mu kasumbi ako? Yakakalizanga, buli ku makya. Yakalizanga eppipa y’obutta, buli ku makya, era yali njerere. Naye bwe yaddayo okwongerera okusena, kwasangibwangamu. Bwaava ludda wa? Twala Katonda

ng'Ekigambo Kye bwe kigamba. Weekakase Katonda. Ye Mutonzi.

¹¹⁸ Oyinza okuba ng'obulamu bwo bukomye. Oyinza okuba nga okussa ekimu kwo tekukyalimo. Mutwale ng'Ekigambo Kye bwe kigamba. Beera mukakafu nti Ye Katonda. Ebiseera eby'ennaku ebiriwo kati, biyinza obutalabika bubi nnyo ssinga otwala Ekigambo Kye n'okakasa nti Ye Katonda.

¹¹⁹ Mu Bugirimaani, olumu, nnalaba ekifaananyi, era kyansigala ku mutima. Omusiizi w'ebifaananyi Omugirimaani yasiiga e... ekifaananyi eki—ekiyitibwa “Ensi y'Ebire.” Era bw'okirengera, ng'osinzidde wala, y'entiisa ey'ennaku gyewali olabye. Olaba bire ebigombaganye, bw'oba ng'obirengerera wala ko. Naye bw'okisemberera obulungi, kikyuka. Biwawaatiro bya Bamalayika nga bibuukira wamu, nga bayimba zi alleruya eri Mukama. Bwetyo n'ennaku bw'ebeera ebiseera ebimu. Bw'ogirengerera, ewala, erabika bubi era nga ekutte kazigizigi. Naye twala Katonda ng'Ekigambo Kye bwe kigamba era obeere mukakafu nti Ye Katonda, ogisemberere, ojja kukizuula nti biwawaatiro bya Bamalayika nga bye bibuukira awamu.

¹²⁰ Omukazi ono yafaananamu nga Ibulayimu bwe yali, bwe yalagirwa okuwaayo byonna bye yalina, abiteeke ku kyoto eky'ekiweebwayo. Oba oli awo naawe bw'otyo bw'olagiddwa, enkya ya leero. Leka amakubo go. Leka obutakkiriza bwo. Leka buli kintu ky'olina. Awo oddire Amafuta n'Ekigambo, obigatte wamu, obiteeke ku kyoto eky'okwewayo nga ssaddaaka. Ojja kukizuula nti, Bijja kuleeta Katonda okweyoleka, mazima ddala nga bw'ondaba nnyimiridde ku kituuti kino.

Kirowoozeko nga bwe tusaba.

¹²¹ Olina ekyeetago leero? Olina ekyeetago nga kinene nnyo mu buntu tosobola kukifuna? Essente ntono nnyo tezisobola kusasula bisale bya nnyumba gy'opangisa? Abaana beetaga engatto empya, ate nga tolina ssente za kuzigula? Eppipa ekalidde ewaka wo, n'akasumbi kanaatera okukalira? Tosobola kugulira bisolo byo mmere? Era, awo, waliwo ekikyamu? Jjukira nti, Yakola ekisuubizo.

¹²² Oli mulwadde, era nga omusawo agamba nti weetaga kulongoosebwa? Tolina ssente za kukikola? Olina ekyetaago.

¹²³ Oli mwonoonyi? Ekyetaago kyo kinene, nga omanyi nti singa Katonda akuyita, olwa leero, oba wa kubula? Oli muntu eyaddirira era adduka okuva mu maaso ga Katonda? Nga ate okimanyi nti oli wa mu kkanisa gundi, kyokka nga okimanyi nti toteredde? Okulumirizibwa kwo kwokka kukulumiriza, okusenziira ku Kigambo, nti toteredde. Era olina ekyetaago. Toganya bigambo bino kugwa ku ttaka ely'amaggwa, oba ku lwazi, ku mitima emikalubo. Leka bigwe ku ttaka eddungi, eggimu.

124 Bw'oba nga oli mulwadde era nga...omusawo agamba nti toyinza kuwona, wabula nga osuubiza Katonda nti ojja kumuweereza ennaku zonna ez'obulamu bwo, era nga okakasa nti Ye Katonda, jjangu otuukirize bye Yetaaga. Bw'oba nga olina ekyetaago, osobola okusooka n'oyimusa omukono gwo eri Katonda, nti olina kye weetaga? Katonda abawe omukisa.

Ka tusabe.

125 Ai Mukama, nga bwe kiri ekikakafu nti nyimiridde ku kituuti kino amakya ga leero, Mmanyi nti tewayinza kuyimusibwa mukono ku egyo egiyimusiddwa nga tomanyi, kubanga Ggwe oli Katonda. Wagamba nti, "Enkazalujja tebazitundamu amapeesa abiri? Mwe temusinga nnyo enkazalujja!" Tosingawo nnyo okulaba emikono gy'ebitonde byo ebifa, Omwana Wo Yesu bye yafiirira! Tosingawo nnyo okulaba emikono gyabwe okusinga enkazalujja, ssinga eba egudde amakya ga leero! Nsuubira...enkazalujja kkumi na bbiri tezandivuddemu nnuu yadde emu enkya za leero, kubanga tewali azeetaaga. Wandibaddewo omutawaana gw'okuziziika. Kyokka omanyi buli emu ku zo; Omanyi ebyoya byonna ebiri ku mibiri gyazo. Omanyi buli luviiri oluli ku mitwe gyaffe.

126 Ai Mukama, yanukula okusaba. Leka bakakase, amakya ga leero, nti Oli Katonda, era nti Mwoyo Wo. Leka ekikome n'okutangalijja kw'eddiini ey'omulembe guno bibaamuke, bwe bagamba nti, "Ha, ndi wa kkanisa *gundi*." Katonda, leka ekyo kive mu ndowooza zaabwe, kaakati. Mu kaseera kano akamu bwe kati, leka balabe Obulamu Obutaggwawo. Olwo babunoonye era balumwe enjala ku lw'abwo, okutegeera Katonda ky'ali, era nga bakakafu nti Waali. Akuuma Ekigambo Kye.

127 Eri omwonoonyi, leka beenenye mangu, beetegekere okubatizibwa mu Linnya lya Yesu Kristo. Era wasuubiza okubawa Omwoyo Omutukuvu. Wakyogera, Mukama. Otuukiriza ekisuubizo Kyo.

128 Waliwo eyaddirira omukakafu nti Ggwe Katonda, kyokka nga yakyaama n'akuvaako. Leka abali nga oyo bajje leero, kubanga Wagamba nti, "Ebibi byammwe ne bwe biba ng'olugoye olumyuufu, binaaba byeru ng'omuzira. Nga bitwaakala nga bendera, binaaba byeru nga ebyoya by'endiga."

129 Era oba nga waliwo abalwadde, leka bategeere nti Ggwe Katonda. Otuukiriza Ekigambo Kyo. Oteekwa okutuukiriza Ekigambo Kyo. Nga beewayo, n'Amafuta gaabwe, Omwoyo ali mu bo ayatula nti bakkiriza. Era, nate, wamu n'Ekigambo, Omugaati ogw'Obulamu ekibuuliddwa, Kristo; ogwaseebwa ku lwabwe, mu Ndagaano Enkadde; ne mu Ndagaano Empya, okulaga nti Aba bumu jjo, leero, n'emirembe gyonna. Leka batabule Ekigambo ekyo n'Amafuta, Omwoyo, oyo gwe bafunye,

olwo balyoke bayimirire ku bigere byabwe mu maaso g'ekyoto, nga bagamba nti, "Kino kye nninawo, Mukama. Nkireeta."

O, nga Onakubisaamu! Nga kijja kuleeta Katonda ow'ebyaafayo okulabisibwa! Nga kijja kuyimusa Yakuwa, n'omutima ogwenyumiriza, nti, "Nnina omwana ananondera. Mmuyisizza mu kigezo, era andaze nti anjagala era anzikiriza. Mukakafu nti Ndi." Kubanga kigambibwa nti, "Oyo ajja eri Katonda kimugwanira okukkiriza nti Waali, era nga ye mugabi w'empeera eri abo abanyiikira okumunoonya." Kituwe, mu kaseera kano, nga bwe tukitadde mu mikono Gyö.

¹³⁰ Era, kaakati, nga tukotese emitwe gyaffe. N'abo abalina kyonna kye beetaaga, mbasaba muyimirire ku bigere byammwe, abaagala okuteeka. . . Kati, bw'oba tokakasa nti Ye Katonda. . . Bw'oba okakasa nti Ye Katonda, agenda kutuukiriza ekisuubizo Kye, obulokozi, okuwonyezebwa, ka kibe kiki, bw'oba okakasa nti Ye Katonda, yimirira ku bigere byo. Bw'oba olina omulala gwoyagala okusabira, yimirira ku bigere byo. Bw'oba—bw'oba okakasa nti Ye Katonda, leka bye weetaaga bimanyibwe mu kunnaanirö ly'abatukuvu. Ekyo mukikola nga bwe muyimirira ku. . . [Ebbanga ejjereere ku lutambi—Umuk.]

"Ndi mukakafu nti Ye Katonda. Nzikiriza nti Akuuma Ekigambo Kye. Era nkakasa nti okusaba kwange. . . Nja kukuteeka wansi w'Omusaayi, kati kati." Bw'okola ekyo, ssa wansi buli kibi, buli. . . Ekibi bwe butakkiriza. Oyinza okuba nga oli mmemba w'ekkanisa, naye ntegeeza kibi, "obutakkiriza" bwo. Obuwaayo bwonna nga ssaddaaka. Oghenda kubuwaayo nga ssaddaaka. Ojja eri omusaalaba. Oghenda kuwaayo, kaakano, obutakkiriza bwo bwonna. Obuweeyo gy'Ali bwonna, era otegeere nti Waali, era nga okakasa nti agenda kwanukula. Bw'oba bw'otyo bw'oli, yimusa omukono gwo. Guleke gutyo.

¹³¹ Mukama, Ggwe Katonda. Gaagano Amafuta gaabwe n'Ennano yaabwe, bitabuddwa wamu. Babireeta ku musaalaba, Omuliro gwa Katonda we gunakkira mu mitima gyabwe (bwe baba nga ddala kye bategeeza) gwokye ssaddaaka eyo. Ojja kukka olabisibwe, okyuse embeera enzibu. Nga okka okuva mu Ggulu, mu ggaali ly'Omuliro. Ojja kunyeenya eggulu lyonna n'ensi, okubawa empeera.

¹³² Nga bayimiridde n'emikono gyabwe mu bbanga, ng'akabonero nti bakkiriza, era nti beeweereddeyo ddala mu bujuvu, na buli kyetaago kye balina, ku kyooto Kyo kwennyini. Ai Katonda ow'Eggulu n'ensi, Omulamuzi w'Eggulu n'ensi, mazima ddala Omulamuzi w'Eggulu n'ensi ajja kukola obutuukirivu. Mazima ddala Ajja kukuuma Ekigambo Kye, Ggwe amanyi emitima gy'abasajja, emitima gy'abakazi, emitima gy'abantu bano.

¹³³ Mukama Katonda, nnyimusa emikono gyange, kubanga mmanyi nti waliwo enkyukakyuka mu buweereza bwange

kati. Era nzikiriza nti Oli. Nkulabye ng'Oyimirira eri mu Mpagi y'Omuliro. [Ow'oluganda Branham n'akonkona ku kituuti emirundi esatu—Omuk.] Nkulabye ng'Okebera ebyama by'omu mitima gy'abantu. Tewali mulundi na gumu Gwe wali olemereddwa. Wakisuubiza bwe wakikola eri, e busukka-kkubo wano, bwe Wali waakatandika okukola ebintu bino. Era n'Onkuumanga bulijjo okweetoolola wonna mu nsi, lugendo ku lugendo. Nkakasa Ggwe Katonda. Ekyo nkikakasa.

¹³⁴ Nneewaayo awamu n'abantu bano, ne ssaddaaka y'ebyo byonna bye nnina, Mukama, gy'Oli, onkozese. Ntandika buto nate, Mukama, okwetoolola ensi yonna. Nnyamba, Ai Katonda. Bwemba nga waliwo lwe nnakubuusabuusa, nsonyiwa ebibi byange. Nsonyiwa obutakkiriza bwange. Mmanyi nti Wooli, era omugabi w'empeera eri abakunoonya.

¹³⁵ Mu ngeri y'emu, njatula ebibi by'abantu bange, enkya ya leero, obunafu bwabwe n'okubuusabuusa kwabwe, nga bayimiridde n'emikono gyabwe mu bbanga. Njatula ebibi byabwe, Mukama, n'obunafu bwaffe bwonna. Tuma Omwoyo Omutukuvu atukkeko, n'akabonero akakakasa nti otukkirizza, nti Ggwe Katonda. Era Oli wano okutusembeza kaakati, n'okutuwanirira mu mikono Gyo, n'okutuddiza buli ekyali kyatunyagibwako. Bwe buba bulamu bwaffe, leka butuddizibwe emirundi kikumi. Bwe ziba mmeeme zaffe, leka zituddizibwe nga zaanye, zaakayakana, zijjudde Omwoyo Omutukuvu, okuleetebwa mu maaso ga Katonda. Bwe buba butakkiriza, leka kuddemu kutuddizibwe nate, Mukama, okukkiriza okujjawo ensozi. Kituwe, Mukama.

¹³⁶ Tukkiriza nti otambula kaakano, nga Omwoyo Omutukuvu abuna mu kizimbe kino kyonna, ku bantu bano, ne mu mitima gyabwe, ng'abaleetera okukkiriza Katonda omulamu. Kino tukikola mu Linnya Iya Yesu Kristo.

Okukkiriza kwange kutunuulidde Ggwe,
Gwe Omwana gw'Endiga ow'e Gologoosa,
Omulozi Omutukuvu;
Mpulira kaakano nga nsaba,
Jjawo ebibi byange byonna,
Era tondekanga okuwaba
Okukuvaako.

¹³⁷ Mukitegeeza? Mukitoola? Wanika omukono gwo, ogambe nti, "Nkitoola kaakano. Mukkiriza."

Nga ntambula mu kizikiza ky'obulamu,
Nga enyiike enneetoloode wonna,
Beera Omulunganyama wange;
Lagira ekizikiza kifuuke emisana,
Sangulawo okutya kw'obuyinike,
Era tonjanyanga okuwaba
Okukuvaako.


Leka tukoteke ku mitwe gyaffe.

¹³⁸ Oluvanyuma lw'Obubaka buno obukambwe, obukalubo; obukakali, era obubuuliddwa mu ngeri enkambwe, naye nga ge Mazima. Era bwoba okkiriza ky'osabye n'obuwoombeefu, nti okifunye, tokkirizanga ekintu kyonna okukujja mu kkubo eryo eggolokofu. Yimirira awo wennyini. Ka mbuulire ntya, nga bwe nsobola, oba omuntu yenna nga bw'asobola, tekijja kukugasa okutuusa ng'okikkiriza nti kiky'o kya bwannanyini.

¹³⁹ Bw'oba okikkiriza n'omutima gwo gwonna, kyonna ky'oyaayaanira, bw'oba oyatudde ebibi byo, Katonda akusonyiye. Tokibusabuusanga nate. Bw'oba nga waddirira, okomezeddwaawo, amakya ga leero. Bw'oba weetaaga Omwoyo Omutukuvu, batizibwa mu Linnya lya Yesu Kristo olw'okuggyibwako ebibi byo. Ekyo ky'Ekgambo kya Katonda. Tagenda kukikyusa kulwa kkanisa n'emu, kibiina kya ddiini nakimu, oba olw'omuntu yenna. Bwekityo bwe kiteekwa okubeera. Tuteekwa okutuukiriza ebisaanyizo Bye, so ssi bisaanyizo by'ekkanisa, bisaanyizo Bye. Ebyo bye tuteekeddwa okukola.

¹⁴⁰ Yagamba nti, "Okusaba okw'okukkiriza kulirokola omulwadde." Bw'oba oli mulwadde, nkusabidde okusaba okw'okukkiriza. Naawe okusabye mu mutima gwo. Era kukkirize, kutwale, era kunyweerereko obutasagaasagana. Kijja kubeera bwe kityo. Tewali kiyinza kukijjawo, si nsonga embeera ya kibululu etya.

¹⁴¹ Ogamba nti, "Naye, ndabika nga akyali omulwadde." Ekyo teki. . .Ebyo biwaawaatiro bya Bamalayika nga bibuukira wamu. Kyekyo. Oyo Katonda mu ndabika ey'omukisa. Kirabika ng'ekibululu gyoli. Gisemberereko kumpi oddemu ogitunuulire, olabe oba ssi Katonda y'ayimiridde awo, nga akuuma Ekgambo Kye.

¹⁴² Kati nga tuckyakotese emitwe gyaffe, olukunjaana njenda kuluddiza Ow'oluganda Neville, omusumba waffe. 

WEEKAKASE KATONDA LUG59-0125

(Be Certain Of God)

Obubaka buno obwabuulirwa Ow'oluganda William Marrion Branham, bwabuulirwa mu Lungereza ku makya ga Ssande, nga 25 Jjanwali, 1959, mu Kkuŋjaaniri lya Branham e Jeffersonville, Indiana, mu Amerika, buggyiddwa ku lutambi olwa kkaseti ne bukubibwa mu Lungereza nga tebukusiddwamu. Buno obuvvuunuddwa mu Luganda bwakubibwa era ne busaasaanyizibwa aba Voice Of God Recordings.

LUGANDA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org